



*Ioseph est aduerty par l'Ange de retourner en Iudée, où il travailloit de son estat,
& Iesus y est assistant.*

IOSEPH mary de la Vierge Marie, fils d'un nommé Iacob de la lignée de Daud, homme ayant la crainte de Dieu, demeura en la contrée d'Egypte avec Iesus & sa mere Marie, durant le temps que le Roy Herodes regnoit en Galilée. Aduint que l'Ange du Seigneur apparut en Egypte à Ioseph par songe, disant ; Leue-toy, & pren le petit enfant & sa mere, & t'en va en la terre d'Israël, car ceux qui cherchoient à mettre à mort le petit enfant, sont morts. Ioseph donc éveillé, prit le petit enfant & sa mere, & vint en la terre d'Israël, mais quand il ouït qu'Archelaus regnoit en Iudée au lieu d'Herodes son pere, & craignant qu'il eust aussi bien succédé à la tyrannie de son pere, comme à son Royaume, n'y voulut aller ; parquoy estant derechef aduerty diuinement de l'Ange par songe ; il se retira en Galilée, & habita en la Cité de Nazareth afin que ce qui auoit esté dit par les Prophetes, fust accompli ; Il sera appelé Nazarien. C'est en ce lieu où Iesus a durant son adolescence tousiours demeuré avec sa mere Marie, & Ioseph son pere putatif, & leur estoit sujet. Or Ioseph travailloit de son estat de Charpentier ; c'est pourquoy Iesus a esté estimé de plusieurs, fils d'un Charpentier, & notamment par les Scribes & Pharisiens, & ce pour rendre au simple peuple sa doctrine odieuse & méprisée.